

" L'OMMU DI LA MUNTAGNA "

Dugna manzanu a l'ippicciadda di la dî,
 lu ribiccu a festha d'una campana,
 è lu saruddu affriziunaddu d'un ommu
 a la sò muntagna.

E' un sinzeru paipidu di cori,
 un ripiru mannu di la vidda tuttu,
 pà chissu loggu chi mai è isthaddu ischadriaddu.
 E' lu tempu chi dî pà dî, ischanzilleggia
 ischanzilleggia li piuti da lu tarrenu
 ma, beddi imprimiddi rimanini li passi
 di cà avveru avveru è sempri isthaddu innammuraddu
 di dugna pianta, di dugna fiori, di dugna eiba arestha
 chi in tutti li cuzzorareddi di chissu loggu vibini
 comu immensu trisoru di natura.

L'occi s'impantani da la baddi,
 candu addareddu a chissa altha zima
 nasci e mori lu sori e i la biddezzia
 di chissa visioni l'ommu s'intendi avveru presumiddu,
 cridendi d'assè l'umiri padroni puru,
 di chiss'immensu balloni d'aranzu.
 Cantu giugnini l'isthasgioni d'inverru,
 lu ventu cun li sò burioni
 imbatti innant'a li baschoni.

I lu sò andà pigia li rami di l'aiburi
 ippasthizieggia fogli secchi i lu tarrenu
 e ippandi i l'aria lu prafummu antigu
 di la terra infusa, eppuru nisciun trimori
 s'annida i l'anima di l'ommu di la muntagna.
 Pagosa eddu intendi lu ventu innant'a la sò peddi
 chena nemmanu azzuddissi e lu fosthi frusciu
 chi l'accumpagna è un ischimuzu di una bozzaredda amiga.
 Dugna sera a lu car'a di la dî,
 lu ribiccu mori mori, d'una campana
 è lu saruddu affriziunaddu d'un ommu
 a la sò muntagna.

E' un veru tristhi di marincunia,
 lu prinetu assai mannu di no pudè assè lu primmu dumani,
 a vidè lu nobu chintari dà lu baschonittu d'una casaredda
 in brazzu a la sò muntagna e vizinu a lu sori.

" Cou Sorrosu "